

Poli'a Korinti

Vahe'mokizmi Ese

Avonkrezami'nea Naneke

1 ¹Poli'na nagra, Anumzamo Agra'a avesite Kraisi Jisasi aposol eri'za vahere hu'nemo'na nerafu Sostenesi'ene.

²Korinti kumate nemniza Anumzamofono mono nagamotarega, Kraisi Jisasi'ma tmazeri avusese hurmantegeta ruotge (saints) huta mani'naza nagatega nevuno, mika vahe kokankoka mni'ne'za, tagri Rantie hu'za agi nehaza vahetegane, zamagri ene tagri ene Jisas Kraisi'a Rantimofono kea kreneramune.

³Nafati, Anumzantegati ene, Ranti Jisas Kraistintegati asunkuzane, rimpa fruzamo'a tamagritega vie.

Poli'a musenke Anumzamofono hunte'nea naneke

⁴Tamagrikura Anumzamofontega musenke huvava nehue, na'ankure Anumzamo'a asunkuzana, Kraisi Jisasi'ma tami'ne. ⁵Hanki Agripinti, keaga hu'zampine, antahintahizatamifina knare nehutma, maka'zampina eri avi'netaze. ⁶Na'ankure Kraisinku'ma huama hu'na tamasmimoazamo, tamagripina eritamage nese. ⁷E'izanku maka Avamupi neramia musezampina atupa nosuta, Rantimo Jisas Kraisi'ma eama hanigu, tamagu'areti avegantaze. ⁸Hanavea tamisigeta referera uhanatigahaze. Ana hanigetma Rantimofono Jisas Kraisi'ma esia kna zupa hazenke tamia omnegahie. ⁹Anumzamo'a ke hunte'nere ana kemofono amage'ante Ne'mo, Agra'a Nemofono Jisas Kraisi Rantimofone trogoteta magopi manisunegu, tagia hu'ne.

Mono vahe'mokizmi amunompi knaza me'nea naneke

¹⁰Nenafugata hanaveti'na tamantahinegoe, Rantimofono Jisas Kraisi agifi miko'motma mago tamarimpa ohunte ahunte nehanageno amunontamifi atane'zana omneno. Ana hanutma fatgo hutma magoke antahi'zampine, tamagesa antahi'zampinena eri mago hugahaze. ¹¹Nafuhetane

nasareheta, mago'a ke ha'ma amu'nontamifima me'nea zankura, Kloesi nagapinti mago'a vahe'mo'za eme nasmi'naze. ¹²Nagra ama kegu nehue, tamagripinti mago'mo huno, Nagra Poli amage'nentoe higeno, mago'mo huno nagra Apolosi amage'nentoe higeno, rumo'a huno, nagra Sifas (Pita) amage'nentoe higeno, eteno rumo'a huno, nagra Kraisi amage'nentoe nehie. ¹³Kraisti'a Agra ataneno refako hu'nefi? A'o anara osu'ne. Tamagritekura Poli keka zafarera fri'nefi? A'o anara osu'ne. Tamagra Poli agifi tina fre'nazafi? A'o anara osu'naze. ¹⁴Nagra Anumzamofona muse huntoe, na'ankure mono tina magore hu'na tina freormante'noe. Hianagi Krispusine Gaiusikizni zanagrike fre znante'noe. ¹⁵Ana hu'negu mago'mo'a huno Poli agifi mono tina fregante'noe huno osugahie. ¹⁶Izo, nagra Stefanasi nomp nemaniza naga mono tina frezamante'noe. Ananteti e'neana mago'a vahera mono tina frezmante'nesuo antahinagekani'noe. ¹⁷Ana hu'negu Kraisi'a mono ti frezamtogura huonante'ne. Hianagi knare musenke huama hanane huno hunante'ne. Hagi ama mopafi mreri antahi'zampinti, Kraisi'ma keka zafare fri'nea zamofu hanave'a eriotregahue.

Kraisti'a Anumzamofu knare antahi'zama'ane himamu'a mni'nea naneke

¹⁸Fnanema hanaza vahe'mo'za keka zafamofu nanekegura neginagi naneke hu'za nentahize. Hu'neanagi tagri'ma tagu'vazino tavre'nea vahe'mota, e'i Anumzamofu himamu'e huta nehune. ¹⁹Ana hu'negu, korapa avontafe'ma krente'nefina anage hu'ne, **knare antahi'zane vahe'mofu antahi'zana eri haviza nehu'na, antahi ankere vahe'mofu antahi'zana eri atregahue** huno hu'ne. (Aisa 29:14)

²⁰Antahi'zane nera ina mani'ne? Avontafe'ma kre antahi'zane nera ina mani'ne? Ama knafi ke hafra hu nera ina mani'ne? Anumzamo ama mopafi antahi'zane vahera, antahintahi'zazmia zmazeri neginagi nehie. ²¹Anumzamofu antahintahimo'a ama hu'negenokino, zmatrege'za ama mopafi vahe'mo'za zmagra'a antahi'zantetira Agrira antahi ama nosaze. Hianagi Anumzamo'a musema nehiana, vahe'mo'za neginagi naneke hu'za nehaza nanekema huama hunke'za zmentinti nehaza vahe zmahoneke. ²²Tmage, Jiu vahe'mo'za avame'za ketete hu'za antahinegazageno, Griki vahe'mo'za antahintahi'zanku nehakrazanagi, ²³tagra Kraisi rugeka zafare ahe'za hanti'naza naneke huama nehunazamo'a, Jiu vahe'mokizmia zmagigo zamino zmazeri tanafahu havegna nehuno, megia vahetera neginagi nanekegna nehie. ²⁴Hu'neanagi, ana Jiu vahe ene megia (Griki) vahetera, Anumzamo'ma zamagima hu'nea vahe'mo'za, Kraisi'a Anumzamofu hankavene, antahintahizama'e hu'za nehaze. ²⁵Na'ankure Anumzamofu neginagizane hu'za, nehaza zamo vahe'mofu antahintahizana agatenereno, Anumzamofu hanave'a omne'ne hazazamo'a vahe'mofu hanavea agatere'ne.

²⁶Nafuheta kma antahiho, inankna vahe mani'nageno tamagia hu'nefi vahe'mofo zamurera antahi'zane vahera omni'nazane, rama'amota hanave vahera omani'nonane, rama'amota zmagine nagapintira omni'nonanagi, ²⁷Anumzamo'a, mopafi vahe'mo'za antahintahizmi omane'ne nehu'za, kafenkami netraza vahepi erizana erino, knare antahintahine vahe mani'none haza vahera, Anumzamo'a zamazeri zamagaze nehuno, hanave'a omne'ne huza haza vahepi eri'zana erino, hanave vahere hu'za haza vahera zamagaze erinezmie. ²⁸Ana nehuno zmagi omnene huza ke fenkami atraza vahepi, Anumzamo'a huvazino zmagine hanave vahera zmazeri zamagaze nehie. ²⁹E'ina hu'negu mago'mo'a Anumzamofu avufina avufaga mareorigahie. ³⁰Hu'neanagi, Agrama eri'nea eri'zamo higeta, Kraisi Jisasimpi mani'naze. Kraisi'a Anumzamofontegati knare antahintahi zantia efore hu'neana, e'i fatgo avu'ava'zane, mani ruotge huno mani'zane, miza hurante Ne' mani'ne. ³¹Ana hu'negu Anumzamofu avontafepina anage huno krente'ne, ***Avufga antemreriku hanimo'a, Ramofoma antahino keno hu'neazanku avufga antemrerigahie*** hu'ne. (Jer 9:23-24)

Poli'a Korinti vahe'mokizmi zamentintigu hu'nea naneke

2 ¹Nenfugtane nasareheta, tamagrite'ma e'noana, haganentake ke'ni'areti ene knare antahintahi zanteti Anumzamofu agenke tmasminakura ome'noe. ²Nagra'ma antahi'zama retro hu'noana, tamagrane mani'nufina mago'zankura ontahigahuanki, Jisas Kraisiama ahe'za rugeka zafare hanti'naza zankuke antahigahue. ³Tmagri'enema manuana hanave'nia omnege'na, kore nehu'na, nahirahi zampi mani'ne'na, ⁴rempima hunerami'na, nanekema huama nehuana, tamagri tmagu'a eri vakanenaku knare antahintahi zampintira osu'noanki, Ruotge Avamumo hihamu hanave'a erinte ama nehie. ⁵E'ina hu'negu tamentintimo'a vahe'mofo knare antahintahi zampina omneno, Anumzamofu himamu hanavefi meno.

⁶Tagrama knare antahintahizamofu keagama nehunana, zmentintifima nena hu'naza vahepi nehune. Hianagi ama knare antahintahigu'ma nehunana, ama knafino, ama mopafi fanane hanaza kva vahetmimofu knare antahintahi zankura nosune. ⁷Tagrama nehunana Anumzamofu knare antahintahia, korapa oku'a retro huntengeno me'neazanku nehune. Ana antahintahizana mopa fore osu'negeno oku me'neana, e'i ana antahintahizana, menima tagrama knare hanunku retro huntene. ⁸Ana antahintahizana magore huno meni gnafi kva vahe'mo'za antahi ama osu'naze. Na'ankure antahi ama hu'nazasina, hanave'ane Ramofona ahe'za keka zafarera ohanziasine. ⁹Hu'neanagi, avontafepi kre'nea kante ante'za, ***avurgamo onkegeno, agesamo ontahigeno, vahe'mo'za antahi'za ke'za osu'nazana Agriku zamavesi nentamokizimi Anumzamo retro huzmante'ne.*** (Aisa 64:4)

¹⁰Hu'neanagi Anumzamoa, Ruotge Avamu'afi huvazino, tagritera eriamana nehie. Na'ankure Avamu'mo mika zana hakareno, Anumzamofoku'a antahi'zama'a erinte ama nehie. ¹¹Na'ankure, iza vahepintira mago vahe'mofo antahi'zampima me'nesia antahi'zana keno antahino hugahie? Agri'a avamu'moke agu'afi me'nesia antahi'zana keno antahino hugahie. Anahukna kante Anumzamofoku'a agu'agesa mago'mo'e huno antahino keno osugahie. Anumzamofoku'ava'antahino keno hugahie. ¹²Menina hago Avamura eri'none, ama mopafi avamurompage Anumzamofontegati Avamure, e'ina hu'negu Anumzamomane neramiazane antahita keta hugahune. ¹³Mika kema nehunana, vahe'mo rempi huorami'nea antahintahi nosune. Anumzamofoku'ava'antahino keno hurami'nea antahintahire nehunankino, ana Avamu'mo taza higeta, avamu antahizampi Avamu'mofo nanekea eri ante mago huta eriamanehune.

¹⁴Hu'neanagi Anumzamofoku'ava'antahino keno omani'nea vahe'mo'a, Anumzamofoku'ava'antahino keno esiazana e'origahie. Na'ankure zmagra anazama kesazana neginagi zankna hanige'za, antahi'amara osugahaze. Na'ankure zamagra Avamu'mo zmaza hanige'za antahi ankeregahaze. ¹⁵Hu'neanagi aza'o Avamu'ene mani'nesimo'a, mika'zana refko huno antahi ama hugahie. Ana hugahianagi mago'mo'e huno Avamu'ene mani'nesimofona refko huno ageno antahino osugahie.

¹⁶***Iza Ramofo agu'agesa antahino keno nehuno antahintahia amigahie?*** hu'ne. (Aisa 40:13) Hianagi Kraisi antahintahizana, tagra eri'none.

Mono eri'za vahe'mofo eri'zana, Anumzamomane tevenuti kreno refko huno kesia zamofoku'ava'antahino keno naneke

3 ¹Nenafugatane nasareheta tamagra ne ko'ma mani'noana, avamupi nena hu'za mani'naza vahe'mo'za nehazaza hu'na nagra noramasamue. Hianagi mopafi avu'avazampi mani'nagu Kraisimpina osi mofavre mani'nazage'na neramasmue. ²Nagra rempima huramufina amiri tamiaza nehu'na, hanave ne'zana noramue, na'ankure tamagra hanave ne'zana eriga osu'naze. Tamage, tamagra hanave ne'zana eri avamentera omani'naze. ³Na'ankure mopafi vahe'mo'za nehazankna nehaze. Na'ankure knive nereta, ke fra amu'nontamifina nehaze. Tamagra ama mopafi vahe'tfa omani'nafi? Tamagra mopafi avu'ava zampi vano hiaza nosazafi? ⁴Na'ankure mago'mo'a huno, nagra Poli amage nentoe nehigeno, rumo'a nagra Apolos amage nentoe nehiana, tamagra mono ontahi vahe mani'nazo?

⁵Apolosi'a inanknahu nere? Poli'na iza'ne? Tagra eri'za vahetfa mani'no'e. Ramo hurantegeta tagra eri'zana e'neru'e. Anumzamomane tagripi huvazino tamaza higeta tamentinti'a hu'naza eri'za ne' tre'ne. ⁶Nagra

avimza asogeno, Apolosi'a ti ami'ne. Hianagi Anumzamoke azeri nena nehie. ⁷Anahigu avimza kri'nemo' o tima ami'nemo enena razana omne'neanki, Anumzamo maka zana azerinena nehie. ⁸Avimzama ase'nemo'ene tima ami'nemo enena magoke eri'zanke e'neriankino, eri'zama eri'na'a avamente ante'ne miza zani'a erigaha'e. ⁹Na'ankure tagra Anumzamofu eri'za vahe manuketa, tamagra Anumzamofu hozane, nonkna hutma mani'naze.

¹⁰Anumzamo'a asunku zama'areti nami'nea avamente, nogi antahi'zane vahakna hu'na nomagi trara eri agafa hunte'noge'za, mago'a vahe'mo'za anante negize. Hianagi magoke magokemo'a, nankna huno kinaku hanuno'a, kva hu'nenno ana agofetura nona kino. ¹¹Hianagi mago'mo'e huno ru tratera nona eri agafa huno onkino, ko'ma ki'nea trateke kino, e'i Jisas Kraisi Agrake ana trara mani'ne. ¹²Anante'ma mago'amo'za kisazana koliretiro, silva retiro, zgo'amo mreri'nea haveretiro, zafaretiro, rampa zantetiro, hofareti negizankna nehazankino, ¹³magoke magokemofona eri'zama'amo'a eama hugahie. Refkoma hania knarera tevereti kreno eri'zama'amofona nena'a eriamu hugahie. Na'ankure magoke magokemo e'neria eri'zamofu hanave'a, tevenu kreno eriamu huno kegahie. ¹⁴Hagi iza ana tra'mofu agofetu eri'za eri'nesia eri'zamo tevema oresigeno'a, mizama'a erigahie. ¹⁵Mago'mofu eri'zamo tevemo tevga resigeno'a, ana eri'zamo'a haviza huno fanane hugahianagi, ana ne'mofona, tevefinti ahokeno avreankna hugahie.

¹⁶Tamagra Anumzamofu mono no mani'nageno, Anumzamofu Avamu'mo'ma tamagu'afima mani'neana ontahi'nazo? ¹⁷Iza'o Anumzamofu noma erihaviza hanigeno'a, Anumzamo'a anamofona azeri haviza hugahie. Na'ankure Anumzamofu nomo'a ruotge hu'negenka, kagra ana no mani'nane.

¹⁸Mago vahe'mo antahintahi huno, nagra knare antahi'zane vahe ama knafina mani'noe hania vahe'mo'a, agra'a ravatga osino. Hanki atrenkeno neginagi vahe maniteno, henka knare antahi'zane vahera efore hino. ¹⁹Na'ankure ama mopafi knare antahi'zamo'a neginagi avu'ava Anumzamofu avufina me'ne. Hanki anage huno Anumzamofu avontafepina krente'ne, ***knare antahi'zane vahe'mo'za knare antahi'za zmireti, vahe rezmatga hunaku hazana, Anumzamo'a zmazenerie.*** (Jop 5:13) ²⁰Mago'ane avontafepina anage hu'ne, ***Ramo'a knare antahi'zane vahe'mofu agafa'a keno antahino hiana, amnezankna nehie.***

(Sam-Zga 94:11) ²¹Ana hu'negu mago'mo ugota hurmante'simfonkura tmavufa ra osiho, na'ankure maka'zana tmagri'zane. ²²Poli'na fi, Apolosi pi, Sefasi pi (Pita), ama mopafi kasefa huno mni'zampi, fri zampi, meni knafi, henkama esiankna maka tamagri'za me'ne. ²³Tamagra Kraisi suza manizageno, Kraisi'a Anumzamofu su'za mani'ne.

Kraisi Aposol naga'amofa naneke

4 ¹Atregeno vahe'mo'za tagriku'ma antahi ramisazana, Kraisi eriza vahere hu'za nehu'za, Anumzamofa oku'zama eri ama neha'a netre'ne hugahaze. ²Hanki menima kva hugahane huno antahi ami'nesimo'a, kvahu fatgo nehinkeno, tamage hu'za hugahaze. ³Nagra nagesa nontahue, Kagrama refko hunante'nano, vahe'mo'za nehaza keagafi (kot) refako'ma hunante'nazana, tamage hu'na nagra'agura refko nosue. ⁴Nragu'ma antahuana nagu nagesamo'a ama hu'ne, hianagi e'izankura nagra'niagura fatgo hu'noe hu'na nosue. E'i Anumzamo Agrake refko nagrira hunantegahie. ⁵E'ina hu'negu refko osuta atreta avega ante'nenkeno, huhamprinte'nea knama Ramo'ma esuno'a, Agra hanimpi oku'a frakino vahe'mofa tumopi me'neaszana, emeri ama nehuno, vahe'mofa agu'afi me'nesiazana eriana hugahie. E'i anankna magoke magoke'mofona, Anumzamo huzmasga huzmantegahie.

⁶Menina nenfugatane nensarogata nagrare' ene Apolosinte'ene huntena nehuana, tamagri'ma tamaza hanigu nehue. Ana hanigeta ama kema nehu'a kemofa agu'agesa keta antahita hugahaze. Avoma krente'nea kante anteramita nemanita, mago'mofa hufenkami netreta, magomofa husga huontegahaze. ⁷Na'amo vahepintira tamagrira tamazeri ruzahura nehie? Naza tamagra ante'naza zana Anumzamo'a, ontami'ne? Hagi koma tamimi'neana, na'a higeta tamufa erira huta e'ori'none huta nehaze?

⁸Tamagri'ma tamesiazana ko eri avite'naze! Tamagra ko tusi'a feno ante'naze. Tagra tamaza osu'nonanagi, tamagra ko kini vahe mani'naze! Tamage nagri'ma navesiana, tamagra ko kini vahe mani'nesage'na, tagranena anahukna huta kini vahe manigahune. ⁹Nagrama nagesama antahuana, Anumzamo'a tagri Aposol vahe'motafi huvazino, henkarfana erinte ama nehie. Vahe'mo'zama ahefrisie hu'za nehazankna nehune, na'ankure ama mopafi vahe'mo'za hunte'za kiza razankna nehunkeno, ankeromo'zane vahe'mo'za neragaze. ¹⁰Tagra Kraisi agimo'ma mareriniazanku negi vahe mani'none, hianagi tamagra Kraisimpina antahi'zane vahe mani'naze! Tagrira hanavetia omneanagi, tamagra hanave vahe mani'naze! Tamagri tmagi hesga nehazanagi, tagrira tagi hupri nehaze. ¹¹Hanki meninena, ne'zankura tga'neteno, tinku tave nesino, kukena timo haviza nehigeno, knona neramizageno, noma mani so'e hu'zana nomne. ¹²Tagra'a tazampinti mraguzatita, eri'za erita ne'zana erifore nehune. Tagri'ma kema huhaviza hurantageta, asomu ke hunezmantone, tahageta oti hanavetita anagna e'nerune. ¹³Vahe'mo'za havigema hurantageta, anan kegura ontahita akoheta eri mago huta nemanune, tagra ama mopamofa kugusopa manineta, vahe'mofa agote'za orogofavegna huta meninena mani'none.

¹⁴Ama nanekea, tamagaze hinogu kre'noramuaniki, nagra navesinentoa mofavre ni'agna hu'na tamavumro nentoe. ¹⁵Na'ankure tamagrira 10

tauseni'a vahe'mo'za Kraisimpi kva kriramante'ne'za tamazeri fatgo hugahazanagi, tamagrira rama'a neramafa omnigahie. Na'ankure nagra Krai Jisasimpinti neramafa'za hu'na mani'ne'na, knare musenkea neramasamue. ¹⁶E'ina hu'negu nagra huhanveti'na neramasamuanke, nagri navu'nava eriho. ¹⁷Ama ana agafare Timotina tamagritega huntogeno vie. Ramofompina kentahino amage nentege'na navesinentoa mofavre ni'agino, agra nagrama Kraisimpima mani'na neozana huramagesa nehuno, hakare kaziga maka mono nompimpi rempima hunermuankna hugahie. ¹⁸Mago'a mota nagrikura, Omegahie huta nentahita, tamagra tmavufga erisaga nehaze. ¹⁹Hianagi nagra Anumzamofa ave'sizama me'nenige'na ame hu'na esu'na, zamufga rahu vahe'mo'zama nehza kegera eme ke'na eri fore osugahuanki, nankna himamu eri'nazafi eme zmagegahue. ²⁰Na'ankure Anumzamofa Kumara kege hu'za omne'neanki, hihamu'ane hanave'a me'ne. ²¹Tamagrira na'anku tmavenesie? Nagra sefu knone e'na eme tamazeri ftago hanufi, avesinte'zane rimpa fruzane esue?

Monko avu'avazanku i'o hu'nea naneke

5 ¹Amanahu nanake eme hzage'na antahi'noe, mago monko avu'ava zamo'a tamagri amunompimpi fore hu'ne, megia vahe'mo'za amanahu havi avu'avara nosaze. Ama ana avu'avamo'a amanahu hu'ne, mago'mo'a nefa a'ma eri'neazanku nehue. ²Higetma tamagaze nehuta, tamasunku hugahazanagi, tusi tamavufga ra nehaze. Anazama hu'nemofona amu'nontmfintira avre atregahaze.

³Tmage huno navufgamo'a tamagra nena anampina omni'noanagi, avamunimo'a tamagra ne mni'nege'na, iza'o anazama hu'nemofona, anampi mani'neni hiaza hu'na hago refko hunte'na ke'noe. ⁴Tamagrama Rantimofa Jisasi agifima eritruma hanafina, Rantimofa Jisasi hanavefi, avamupi tamagra ne manigahue. ⁵Nagrama nehuana, ana nera sata azampi avre'trenkeno amega avufga azeri haviza nehinkeno, Ramo esnia knarera avamu'a agu'vazigahie.

⁶Tamagra tamagi erisaga nehazageno knarera nosie. Sikonima herazafima, osi'a zistima antageno ana mika'zama azeri zonereana tamagra ontahi'nazafi? ⁷Korapa zistia erinetretma, tamagra kasefa zo-ore bretigna hutma maniho. E'i ana avamente tamage zo-ore breti mani'naze. Na'ankure Kraisima atama eri'neazamo'a, kinafinti ozmahe zmagetere'nea knare antahimi'za nenaza (Pasova) sipsipi afu fri'neankna hu'ne. ⁸Ana hu'negu ana knare'ma muse hanunana, korapa zistima ante'nea bretia, kumi ene havi avu'avateti nosune. Hianagi ana knare musema hanunana, zo'ore bretia, e'i tamage kene, tamage avu'avateti ene musena hugahune.

⁹Ko'ma avoma krerami'nofina monko avu'ava zampi mani'nesia vahe ene tragotetma omaniho hu'na hu'noe. ¹⁰Nagra nehuana megia vahe'mo'za monko avu'ava nehazampi, vahe'mofozanku ke zmanunu

nehaza vahepi, zamagraguke nentahiza vahepi, krunage hu'za musufa nesaza vahepi, havi anumzante mono hunentaza vahe'ene tragotetma omnihogura nosue. Tamagrama amanahu vahe'ma zmatre varegahunema hanutma, ama mopa atrevgareho. ¹¹Hu'neanagi nagrama avoma krerami'nofina, mago ne'mo'ma Kraisinte namentinti nehue nehuno, monko avu'avaza nehuno, vahe zante kenunu nehuno, havi anumzante mono hunenteno, vahe huhaviza hunenteno, aka ti neno neginagi neneno, havige huno kumzafa zante hania vahe'ene, tragoteta ne'zana onetfa hiho hu'na hu'noe. ¹²Megi'a mani'naza vahe'ma refko'ma huzmante eri'zana nagri zana omne'ne. Hianagi mono agu'afima mni'nea vahera, tamagra amne refko huzmantegahaze. ¹³Hu'neanagi Anumzamomegi'a mni'naza vahera refko huzmantegahie. ***Amu'nontamifinti havi avu'ava'ma hania nera, tamagra'a ahenati atreho.*** (Diu-Kas 17:7)

Mono vahe'mo'za kegaga ohunte ahunte osnaza naneke

6 ¹Mago mono neramafu'ma hazenke hurmantesigetma keagare avretma vunaku'ma hanutma, mono kva vahete avretma vuga'zanagi, nahigetma fatgo osu megia kva vahetera avretma nevaze? ²Anumzamofonaga'mo'za ama mopama mago kna refko'ma hnazazana, tamagra ontahi'nazafi? Hagi mopafi vahe'ma tamagrama refkoma hu'nesutma, na'a hanigetma tamagra neonse keagama amu'no tmifima fore'ma hiankea erifatgo osugahaze? ³Tagrama henkama ankeronaga'ma refko'ma huzmante'sunana ontahi'nazo? Nahigetma onensa hazenkea refko osugahaze! ⁴Hu'negu amu'nontamifima mago tamarimpa osu'zama fore'ma higeta, tamagra nahigetma mono nompima zmagima omne'nea vahera huzmantage'za, ana kema refko hutera o'netize? ⁵Ama kema nehuana tmagaze hinogu nehue! Tamagripina magora keaga refkohu knare antahintahine vahera omni'negeno nehiaza nehaze. ⁶E'ina hugaragi, mono ne'mo'ma, mono nefuma keaga huntenakura, avreno fegia vahe'mofo zamufi hunente.

⁷Na'a hanigeta ana knazana tamagra 'a e'origahaze? Na'a higeta havizama hurmantazana atrenozmantaze? E'inama hazazamo'a tamagerafa huno tmagrira tmazeri fenkami netre. ⁸Hianagi tamagratmi kefozana nehutma, reramata nehaze. E'inahu'ma nehazana, mono tmafuhe'ine tmasarehe'ina kefozama hazana atrenozmantaze.

⁹Anumzamofokumara fatgo osu veamo'za erisanti ohregahaze hu'nea kea tamagra ontahi'nazafi? Atrenkeno tmagri'a antahintahimo'a tmazeri havia osino! Monko avu'ava'zamo azeri haviama nehia vahe'ma, amema'a omne zante monoma hunentea vahe'ma, ru vemofo a'nene, aravema hu'nea vemo'o, a'mo'ma atreno ru vene savri nehiane, vene'nemo vene'nene monko'za nehia vahe'mo'zane, ¹⁰kumzafa vahe'ene, vahe'zante kenunu nehia vahe'ene, aka ti neno havia huno neginagi nehia vahe'ene,

vahe'mokizmi zmarimpa zmazeri havizahu ke nehaza vahe'ene, krunage nehaza vahe'mo'za, Anumzamofu Kumapina uofregahaze. ¹¹Mago'amota e'inahu vahe korapara mni'nazanagi, Anumzamo sese hurmanteno, tmazeri ruotge hu'ne. Na'ankure Ramofu Jisas Kraisi Agifine, Anumzantimofu Ruotage Avamupi higetma, tamagra Anumzamofu avufina fatgo vahe mni'naze.

Tavufgamo'a Anumzamofu su'a me'nea naneke

¹²Miko'zana knare hu'neanki'na amne hugahue hunka hugahanagi, anampintira ana miko'zamo'a kaza osugahie. Ana hugahianagi, mago'zantere hu'na kazokzo huontesue. ¹³Ne'zana narimpamofu suzane, narimpamo'a nezamofu suzanagi, ana taregara Anumzamo'a znazeri haviza hugahie. Kavufga monko avu'ava'za hunka eri haviza hu'zana omne'neanki, Ramofu suza menegeno Ramo'a, tvufgamofu su'ane. ¹⁴Anumzamo'a Ramofona azeri oti'neankino, tagri enena anazanke huno, Agri'a hanavereti tazeri otigahie.

¹⁵Tamagri tamavufgamo'a, Kraisi avufgama me'neana tamagra ontahi'nafi? Amane Kraisi avufa eri'na monko avu'ava zante'ma atresuana knare hugahifi? I'o ana osutfa hugahie! ¹⁶Huge, iza'o savri a'ene monkozama himo'a, ana a'ene mago zanavufga eri'nesa'ana ontahi'nazafi? Na'ankure avontafepina amanahu ke hu'ne, ***Taremokea erimago znavufa segaha'e hu'ne.*** (Jen-Agf 2:24)

¹⁷Hianagi mago'moma Ramo'ene hagerafino manisimo'a, avamupina znagra magoke Agranena hu'ke mani'nae. ¹⁸Savari monko avu'ava zampintira atretma freho! Mika kumi'ma mago'mago vahe'mo'ma nehiana, megia'avufare nehianagi, iza'o savari monko'za nehimo'a, agra'a avufga azeri kumi nehie. ¹⁹Tmavufamo'a Ruotage Avamumofu mono no me'negeno, Ruotge Avamuma Anumzamo'ma tmagri'ma tmi'nea avamumo'ma anampinkama mni'neana tamagra ontahi'nazo? E'ina hu'negu tamagra 'a su'ana omni'naze. ²⁰Na'ankure tmagrira Anumzamo'a ko tusi'a mizanteti miza sermante'ne. E'ina hu'negu tamavufgareti Anumzamofu Agi'a erisaga hugahaze.

Arave hu'zamofu naneke

7 ¹Mago ne'mo'ma a'ma e'orisiana knare hugahio hutma avompima kre'naza zanku, menina kenona nehue. ²Na'ankure monko avu'ava'za hu'zanku, mago mago vemo'a agra'a, a' antenkeno, mago mago a'nemo'a agra'a ve antegahie. ³Vemo'a agra'a a'ene masenkeno, a'mo'a anazanke huno ve'ane masegahie. ⁴A'mo'a agra'a avufgamofu kva omani'neanagi vemo kva hu'ne. Ana hukna huno vemo'a agra'a avufga kva osu'neanki, a'amo kva hu'ne. ⁵Tanavufa eri mago huzankura i'o osi'o. Hianagi mago tanarimpa hutna mago'a kna amne mani'neta, nunamu hanu'e hanuta'a,

amne anara hugaha'e. Hianagi anama hutesutna ete ko eme tragoteta mani'o. E'i ana hutna tanavufamofa avesizana kegva nehnakeno, Sata'ma retanaheno ke'niana, evu oramigaha'e. ⁶Amagama nehuana nagrama nagesa antahiramua kazigatire, hagi ama kema nehuana ana hihogu tutu hunormantoe. ⁷Nagra nagesama antahuana, nagrama a' e'ori manuanakna hu'za hakare vahe'mo'za manisazegu nehue. Hianagi mago mago'mo'za rumofo rumofo museza Anumzamofonteti eri'naze. Mago'amo'za ama mani'noaza hazageno, mago'amo'a arave hu'za mani'naze.

⁸Arave osu vahe'ene, kento vahe'mota knare'ma hurmantesiana, nagrama mani'noaza hanageno'e hu'na nehue. ⁹Hu'neanagi tmavufamofa avesizama kva hu'za omne'nesige'za, zmatrenke'za ve eri, a' eri hiho. Ana hanagu knare'ma haniana ve eri, a' eri hu'za mani'nesageno monkozamofa zmavesi'zana omnegahie.

¹⁰Ko'ma arave hu'naza vahe'motarega kasege huneramantoe, nagri kasegeompage Ra Anumzamofa kasege. A'mo'a ve'a otreno. ¹¹(Hu'neanagi anama hanuno'a, atrenkeno ve e'ori amne manino, huge znarimpa eri mago huke, ete neve ene, eri hagerafikeno), vemo'a a'amofona otregahie.

¹²Ruga'amotagu anage nehue, Ra Anumzamofa keompage nagra nehue, mago neramafu a'mo amentinti nosnianagi, agri ene muse huno neminsigeno'a, agra nenarona otregahie. ¹³Anahukna huno mago a'mo eri'nesia vemo, amentinti nosnianagi, agrane muse huno neminsigeno'a, nevena otregahie. ¹⁴Ana hu'negu amentinti osu ve'mo'a, nenaro ene maniazamo azeri avusese nehigeno, amentinti nosia a'mofona neve enema maniazamo, azeri avusese nehie. Ana'ma osnigeno'a mofavre zgazniamo'a agrua osisine. Hu'neanagi menina zamagrira zmazeri ruotge nehie. ¹⁵Hu'neanagi amentinti nosanimo ve atre, a' atre hukuma haniana, zmaze'ori zmatrenke'za ana hiho, amama mani'naza nomanizampina nerafuno, neresarona mago'zamo'a kina reozmanteno. Hianagi tarimpa frune manisunegu, Ra Anumzamo tagi hu'ne. ¹⁶Hu'negu inankna hunka a'moka, ve'kamofa avu'ava'zana antahigahane? Hifi inankna hunka vemoka, akamofa avu'ava'zana antahigahane?

**Nankna huta mani'nonkeno Anumzamo'a tagi
hu'ne, anankante manisuna naneke**

¹⁷Ra Anumzamo'a magoke magoke'mofoma inankna avamente mni'nesigeno, Anumzamo'ma agima hu'nesimo'a, ana avamente manino. Ama anahukna tra ke miko mono nopina nezamasamue. ¹⁸Mago'a vene'nemotma oku tmavufa tga hu'nazageno tamagi hu'nenigetma, tamagra oku tamufgama taga hu'neaza eriso'e hu'zankura maragu'za otiho. Mago'amo'za oku zamufga tga osu'nenke'za, zamagi hu'nesimo'za, zamagra oku zamufga tga osiho. ¹⁹Avufgama taga hu'zane, avufgama tga osu'zamo'a amane'za me'ne. Hianagi Anumzamofa kasegema amage

ante'za razana me'ne. ²⁰Zamatrenke'za mago mago vene'nemo'za ina avamente mani'nageno zmagi hu'ne, ana avamente maniho. ²¹Kazokzo eri'za vahe mani'nankeno, Anumzamo'a kagi hu'nefi? E'i zankura kagesa ontahio. Ana hu'neanagi kagrama kankamu me'nesigenka kina vahe'ma omninaku hanunka, amne kagra ana hugahane. ²²Hu'negu i'zano, kazokzo eri'za vahe mani'nesigeno, Ramo agi hu'nesimo'a, Ramofompina kina vahera omnigahie. Anankanteke kina vahe'ma omni'nenigeno agi hunesimo'a, Kraisi kazakzo eri'za vahe manigahie. ²³Tamagrira tusi'a mizanteti ko miza sermante'neanki, vahe'mokizmi kazokzo eri'za vahera omaniho. ²⁴Inankna kante mago'mo'a mani'negeno agi hu'ne, nenfuga nensaroga, atregeno ana kante Anumzamofompina manino.

Arave osu vahe'mofo nanake

²⁵Arave osu vaheku'ma nantahige'naza zankura Anumzantegatira mago kasegea e'ori'noe. Hu'neanagi nagra Ramo'a asunku zama'areti huvempa hunantege'na mani'nomo'na, nagrani'a antahi'za hu'ama nehue. ²⁶Hu'negu nagrama antahuana, menima fore nehia hazenke'zampina, ana ne'mo mani'nesia kante'ma mani'nigeno'a, so'e hugahie. ²⁷Ko'ma, a'ma eri'nesunka, a'kamofu atre zankura ontahio. A'ma eritenka atrenesunka, a'ma erizankura ohakro. ²⁸Hu'neanagi arave hu'nesamoka, kumira osu'nane. Hu'negu vene omase mofa'mo aravema haniana, kumira osugahie. Ana hugahianagi, aravema hanimo'a ana nomanizampina rama'a knazampi ufregahie. Tamaza hanigu ama nanekea nehue. ²⁹E'igu amanage hu'na nehue, nenfugata nensarogata, knamo'a atupa hu'negu, aza'o a'ma antenesimo'a, a' onte vahekna huno manino. ³⁰Zmavunu nehanimo'za zavi ote vahe kna hu'za maninkeno, musema nehanaza vahe'mo'za muse osu vahe kna hanageno, mizanesesimo'a, fenoma'a omane vahe kna huno manino. ³¹Ama mopafi zama eri'nenimofona atrenkeno anazamo'a razana oseno. Na'ankure ama mopane anampima menima me'neazamo'a, fanene hugahie.

³²Nagrama nentahuana ama mopafi zankura antahintahi hakarea osihogu nehue. Aravema osu'nea ne'mo'a, Ramofonku antahintahi nehuno, Ramofo azeri muse huzankuke hinogu nehue. ³³Hu'neanagi arave hu'nesia ne'mo'a, ama mopafi zanku antahintahi'amo'a nehinkeno, nenaro azeri muse huzanku antahigahie. ³⁴Ana hu'negenokino ana ne'mofona avesizamo'a fako nehie. Arave osu a'mo'o, mofamo'enena Ramofo zanku antahintahi neha'e. Avufgare ene avamupina ruotage hugahie. Hu'neanagi arave hu'nenia a'mo'a, ama mopafi zanku antahintahi nehuno, nevena inankna hu'na azeri muse hugahue nehie. ³⁵E'i ama ke'ma nehuana, tamagri'ma tamazeri hanavetinigu nehu'na, i'o hunoramante'na tamazeri amuho nosue. Hu'neanagi mopafizamo tamazeri fako hinketa, havizampina uofreta Ramofonte hanavetita manihogu neramasamue.

³⁶Hianagi, mago ne'mo'ma vene omase mofa a'erinaku nehanigeno, ve erigahie huno huntonesia knamo agateresigeno, a'eri avesizamo ra hanigeno'a, akoheno omniga osaniana, e'i kumira omneneanki atrenkeno arave hino. ³⁷Hu'neanagi mago ne'mo'ma antahintahi'afi huvempama huno, a' e'origahue huno hu'nesuno'a, agra avesizama kegva nehuno hantka hantako osnigeno'a knare hugahie. ³⁸Hu'negu agra'a vene omase mofa'ma a'ma erigahie hu'nesimofoma a'ma erisiana knare hugahie. Hu'neanagi aza'o a'ma e'orimo'a knare zantfa hu'ne.

³⁹Neve'ma ofrino mani'nesigeno'a, nenaro'a neve a' tfa mani'neanangi, neve'ma frisigeno'a amane Ramofonte mani'nesia vea erigahie. ⁴⁰Hu'neanagi nagrama antahuana, ana a'moma vema e'ori'ma amanema manisiana, rama'a muse hugahie. Nagrama antahuana Anumzamofa Avamumo nasamianke neramasamue hu'na nehue.

Havi anumzante kre sramnavunte'zamofa naneke

8 ¹Vahe'mo'za kaza osu'za havige anumza zmazanteti tro hunte'ne'za, kresramna vunte'naza ne'zanku krenami'naza zanku tmasami'za hue. Tagra antahi'none ana mikamota antahizana eri'none. Antahi'zamo'a tavufa erisaga hianagi, avesinte'zamo'a zmazeri hanavenetie. ²Mago'a vahe'mo'zama hakare'zana antahi vgare'none hu'za antahigahazanagi, zahufa zamagrama antahiga avamentera antahi'naze. ³Hu'neanagi iza'o Anumzamofonku avesinentemofona, Anumzamo'a agrira antahino keno hu'ne.

⁴E'ina hu'negu vahe'mo'za kaza' osu havige anumza zmazanteti tro hunte'ne'za, kresramna vumentaza ne'za ne'zamofonkura, tagra antahi'none, ama mopafi havi anumzana amnezane. Hagi mago anumzana omani'neanagi, mona mopa tro hu'nea Anumzana, Agra magoke mani'ne. ⁵Na'ankure rama'a zanku monafine mopafinena anumzane hu'za nehazanagi, tamage hakare'a anumzane, hakare'a ra mani'neanagi, ⁶tagrira magoke Anumzana Nerfakino hakare'zana Agri konkomp fore higeta, tagra Agrite manunkeno, Agra magoke Rantia Jisas Kraisi mani'ne. Agripinti mikazana Anumzamo'a tro higeta, tagranena Agripinti tasimura e'nerune.

⁷Hu'neanagi ama ana antahizana ana mika'mo'za antahi'naze. Na'ankure mago'amo'za, havi anumzankura tamage'zane hu'za nentahi'za, antahintahimo'a meninena me'negenokino, nezama kresramna hunte'naza ne'zana nenaze. Zamagra zmagesama antahizana tamage huta Anumzamofa mono hunentone nehu'za, ne'zana nenageno zamagu zmagesamo'a savri nehie. ⁸Hu'neanagi ne'zamo hinketa Anumzamofontera uravao osugahune. Ne'za onesunazamo'a, tazeri haviza osuge, ne'za nesunazamo'a tazeri knare osuge hugahie. ⁹Tamagra antahi oza hutma hanaza zamo, zmentintifi hanave oti'naza vahera zmagigo

zami havegna huzankura kva hiho. ¹⁰Na'ankure antahintahi zmimo hanave oti'nesaza vahe'mokizmi zamufi knare antahintahine vahe'mota havi anumzamofu mono nompri ne'za nenesanke'za, ru zmagu'afi me'nea zmagu zmagesa eri hankavetisanke'za, kaza osu havige anumzante kresramana vu'nesaza ne'za nenaze hu'za hugahaze. ¹¹Ana hu'negu mreri antahi'zanka'amo hanave'a omne'nesia antahi'zane mono naga, Kraisi zamagriku huno fri'nesia naga zmazeri haviza hugahie. ¹²E'ina higu ama ana kazigati hanave'a omne negafuno, negasaroma kumipi avrente'sanana, agu'agesa azeri haviza hu'nanankinka, kagra Kraisintera kumi hu'nane. ¹³E'ina hu'negu, ne'zamo'ma nenefuno nensaroma kumipi avarentesige'na, nagra mago'ane kresramna vu'nesia afu'mofo ame'a onesuzamo'a, mago'mofona kumipina avreontegosue.

Poli'a miza e'ori aposol eri'zama eri'nea zamofu naneke

9 ¹Nagra kina vahe omani'nofi? Nagra Jisasi aposol eri'za vahera omni'nofi? Jisasina Rantimofona onke'nofi? Tamagra Ramofonte eri'za eri'noa rga'a omni'nazafi? ²Hianagi mago'a vahe'mo'zama antahizana aposol vahera omni'ne nehazanagi, tamage tamagritera aposol vahe mani'noe. Na'ankure Ramofonte aposel eri'za eri'noa zamofu nena rga'a tamagra mani'naze.

³Nagra refkoma hunantaza vahekura amanage hu'na kenona hunezmantoe. ⁴Mizantigna huta kave ene tinema erisunazamo'a, e'i knarera osu'nefi? ⁵Aposol naga'ene Jisasi agnahe'zane Pita'enema hu'nazaza huta zmentintine a'nea eri'neta, zmavareta vanoma hanunana, e'i knarera osu'nefi? ⁶Hanki, Banabasi ene nigrane tagra'ake zgo eri'za erita kegva hanuke'za, mago'amo'za anara osugahazafi? ⁷Ha'ma nehia vahera, agra'a erizama'arera, agra'a miza senentefi? I'o ru vahe'mo'za mizana nemie. Iza'o vaini hozama kri'nemo'a, rga'a krepia tagino nonefi? Iza'o sipisipi afuzga kegva nehimo'a, ami rima'a tatino nonefi? Ozo agra tatino nene.

⁸Nagra, vahe antahi'za avaririna kea nehufi? Anumzamofu kasegemo ene hu'neaza nehue. ⁹Na'ankure Mosese kasegefina krente'ne, ***tamagra bulimaka'o afu'mo'ma witi akru'ma nehresifina, agitera ana'okinenkeno anampintira ne'zana zogino neneno witia hareno hu'neana bulimakaonku hu'nefi? A'o.*** (Diu-Kas 25:4) Anumzamofu bulimakao afukuke ama kea hu'nefi? A'o. ¹⁰Ama tamage tagriku hu'nefi? Izo, tagriku huno krente'ne, hoza erisimo ne'zama nesigu amuhara nehanigeno, witi akru hre'nimo enena anampinti'ma ne'zama refko huno erisigu amuhara hugaha'e. Mono eri'za vahera, monoma zmasamisia vahe'mo'za, miza sezmanteho. ¹¹Tagrama Avamumofu avimzama tamagripima negrita, amega tavufgare zama tmagripinti erisunazamo razana me'nefi? Amne osi'azana erigahie. ¹²Hanki mago'amo'za kema

eme huama hza vahe'ma zmaza nehanuta, tagri enena tagesga huta mizana ontamigosazafi? Tagra hugazanagi nosune. Na'ankure Kraisi knare musenkemofa kama renkni rezanku anaknaza e'nerue. ¹³Ra mono nompima eri'zama e'neriza vahe'mo'za, kre sramna vunaku ra mono nompia eri'za neaza ne'zampinti, ne'za zmia e'nerize. Higeno kre sramnavu itare eri'za e'neriza vahe'mo'za, ne'za zmia kre sramna vu itareti e'nerizanki tamagra ontahi'nazo? ¹⁴E'inahu kna kante, Ramo'a huno, Iza'zo mono ke hanaza vahe'mo'za, zamaza hu'zana, mono kema hanage'za antahisaza vahepinti erigahaze. (Luk 10:7-9)

¹⁵Hu'neanagi nagra hugazanagi nosue. Nagra ama avoma kreneramuana, mago'za hunantehogura nosue. Na'ankure nagrama agi omne vahekna hu'na frisugeno'a, knare hugahie. ¹⁶Na'ankure nagra knare musenke hanuazankura nagia e'origahue. Mono kema hu'zana Anumzamo huo huno hunante'nea eri'zanki'na ana eri'zama e'orisuna nagra havizantfa hugahie. ¹⁷Nagra navesite knare musenkemofonte miza e'ori eri'za erisu'na, mizama'a me'neanki'na erigahue. Hianagi navesite'ma e'norinuna, Anumzamo antahinamino, kegva huo hunante'nea eri'zanki'na e'nerue. ¹⁸Nagra na'a mizani'a erigahue? Nagrama knare musenkema tmasamua zankura miza seho hunormantoe, ana hu'negu knare musenkerera mizana eriga'zanagi e'norue.

¹⁹Na'ankure mago vahetera kina vahekna osu'noe, nagra hakare vahe'mofo kazokzo eri'za vahe mani'ne'na, rama'a vahera zmavregahue. ²⁰Jiu vahe'ma zmavarenakura zamagrikna hu'na mani'ne'na nezmavroe, nagra'a kasegemofa agorga omni'noanagi, kasegemofa agorga mni namokizmia, kasegemofa agorga mani vahe kna hu'ne'na nezmavroe. ²¹Kasegema e'ori namokizmi zmavrenakura, kasege e'ori vahe kna hu'na mni'ne'na nezmavroe. Nagra Anumzamofa kasegema avariri zantera mni'noanagi, nagra Kraisi kasegemofa agorga'a mni'ne'na, kasegemofa agorga'a omni'namokizmi nezmavroe. ²²Hanavezimi omne'nemokizmirera, hanaveni'a omne vahe kna hu'na mani'ne'na nezmavroe. Nagra maka vahetera zamagrama mani'naza avutigati hu'na mani'ne'na nezmavre'na, mago'amokizmia zmagu'vazino zmaho'ma kenigu mika'zana nehue. ²³Ama ana miko'zama nehuana, knare musenkegu hu'na nehue. E'ina hanige'na anampintira nagra'a asomura erigahue.

²⁴Zmagare zokago vahe'mo'za zmagama razafina, hakare vahe'mo'za zmaga nerazanangi, magoke'mo zamagatereno mizana e'nerianki ontahi'nazo? E'ina hukna kante tamaganeretma mizana erigahaze. ²⁵Mika'mo'za zokagopima ufrenaku'ma hazamo'za, zmufamofa zmesizana maka'zampina kegva nehu'za, zamagra zmesi'zana novaririze. Mizama eri'zana osiagnafi meno haviza nehie. Hianagi tagrama erisuna mizamo'a mevava hugahie.

²⁶E'ina hu'negu nagrama nagama neroana, uhnatigahue hu'na hu'nore uhnatinaku nagare'na nevue. E'inahu kanteke nagrama nazama atroana, amne zahopina notroanki, ahegahue hu'na huazana nehoe. ²⁷Vahe'mokizmi mono ke zmasamite'na, ru nagrani'a miza e'orizanku, nagrani'a navufga hanaveti'na amasagugeno, nagri navesi'za nevaririe.

**Korapa Israeli vahe'mo'za hu'naza havi znavu'zma
hu'zanku kva hanuna naneke**

10 ¹Na'ankure nafuheta, Nagrama nentahuana, antahi ama hnazegu nehue, korapara tagehe'za hampomofa agorga'a nevu'za, hagerina takah'e'naze. ²E'i ana zamo'a mika vahe'mo'za mono ti freankna hampompine hagerimpina nehu'za, Mosese avariri'nazana, ³ana mika'mo'za ana hukna avamupi ne'za nene'za, ⁴ana mika'mo'za anahukna hu'za avamupi ti ne'naze. Na'ankure zamagrama tima ne'nazana, zamaganema ne-ea avamupi havereti ne'nazankino, ana havea Kraisi'e. (Eks-Uti 17:6, Nam-Ham 20:11) ⁵Hu'neanagi rama'amo'za Anumzamo'a muse osiaza hute'za, ka'ma mopafina ufri efri hu'naze.

⁶E'inahu zama zamagripima fore'ma hu'neazamo'a, tagritera avame'za me'neni huraverina, e'inahu kefo avu'ava'zana kerasane osugahune. ⁷Tamagra mago'a vahe'mo'za hu'nazaza hutma havige anumzante monora huonteho. Amanage huno Anumzamofa avontafepina krente'ne, ***havige anumzante mono hunente'za, ne'zane tine nene'za, oti'za monko avu'avaza hu'naze.*** (Eks-Uti 32:6) ⁸Mago'amo'za monko avu'avaza nehu'za, ana zagefinke 23 tauseni'a vahe fri'nazankna hu'zanku, tagra monko avu'ava'zana osanune. ⁹Ramofoma rehe'nazankna huta tagra rehetu onkesune, mago'amo'za anahu kna hzageno, ha osifave'mo zmahe fri'ne. ¹⁰Ke hakare hu'nazankna osnune, mago'amo'zama anahu kna hzageno, vahe'ma zmahefri ankeromo zmahe fri'ne. ¹¹Ama ana zantmima zmagrite fore'ma hu'neazamo'a, tagri rempi huramiza me'neni tazeri fatgo hanigu krente'ne. Ama vgare knafima ehnatisia zanku hu'ne. ¹²Kagrama oti hanaveti'noe hunka nentahisunka, traka hu'zanku kva huo! ¹³Antahio! revatga zama ne-eana kagritekera nome, hakare'a vahete neankna huno ne-e. Anumzamo'a Agra knare hu'neankino atresigeno, ana revatgazamo'a hanavetino kazeri otregahie. Revatgaza ne-enkeno'a katresigenka evuoramigahananki, kana kaverina oti hanavetinka manigahane.

¹⁴E'ina hu'negu knare rone'nimota havige anumzantetira manigneta maniho. ¹⁵Nagra kema nehuana knare antahizane vahe'motma neramasamue. Tamagra refko hutma nagra nehua kea antahigahaze. ¹⁶Tagrama kapufinti tima nenakura, Anumzamofa susu hunteteta nenone. E'i ana kapufinti tima erifko'ma nehunana, Kraisi korana omne'nefi? Tagra bretima korita, erifko huta nenonana, e'i Kraisi avufga omne'nefi? ¹⁷Hianagi

magoke breti me'negu, ana maka'mota hakare mani'none nehunanagi, magoke tavufga me'ne. Na'ankure mago bretireti refko huta nenone.

¹⁸Israeli vahe'mo'za hu'naza zanku tamagesa antahiho, kresramna vu itaretira refko hu'za ne'zana nonazafi? I'o nenaze. ¹⁹Hagi nagra na'anku nehue? Havige anumzantaminte kresramna vunentaza zana amnezane, havi anumzana amnezane hu'na nehue. ²⁰I'o hue! Fegi'a vahe'mo'za anankavera Anumzamofontera kre sramna vunontazanki, havi avamutaminte kresramna vunentaze. Nagri'ma nave'nesiana havi avamutaminte tragoteta omnihogu nehue. ²¹Tamagra havi hankromofu kapufinti tagitma nenetma, ete Ramofu kapufinti enena tagitma onegahaze. Havi hankromofu tafepinti nenetma, ete Ramofu tafepintira onegahaze. ²²Tagra Ramofu azeri asivazinaku nehumpi? E'ina'ma hanunana tagri hanavemo'a, Ramofu hankavea agetere'ne nehumpi? I'o.

Hakare zama hanumpina Anumzamofu agi'a erisaga hanuna naneke

²³Tagra mika'zana amne hugahunanagi, ana mika'zamo'a taza osugahie. Tagra mika'zana amne hugahaze huta hugahunanagi, ana mika'zamo'a, tazeri hanave otigahie. ²⁴Tagri'ma tazeri knare huzankukera ontahisunanki, tva'ontire'ma nemnizamokizmi zmazeri knare'ma hanunazanku antahisune.

²⁵Amne ana miko ame'ama zgore'ma atresazana mizaseta negahazanagi, ana ame'a agura igati eri'naze hutma zmantahiogeho. Ru tmagu tamagesa eri haviza hugahie. ²⁶***Na'ankure mopane anamiko zama agu'afima me'neazana, Ramofozanke me'ne.*** (Sam-Zga 24:1) ²⁷Mago amentinti osu vahe'mo'ma kagi hanigenka vanunka, afu ame'ama kamisiazana nenenka antahige' antahagera osuo, ru antahintahi ka'a eri savri hugahane. ²⁸Hianagi mago'mo kasamino, havi anumzante kresramna vunte'nea afu ame'e hanigenka onegahane. Na'ankure ana kamisimofu knare'zanku hunka onegeno, anama kamisimo'a kefozane huno antahigahie. ²⁹Kagrika'a antahintahizankura nosuanagi, rumofu antahintahizanku nehue. Inankna hu'za nagra navesite'ma huazana refko antahintahifina nehaze? ³⁰Hanki nagra Anumzamofu susu huntete'na ne'zama noazankura, na'anku haviza nehie hutma nehaze?

³¹Hanki, kave nesano tinesano inankna'zama hanunka, Anumzamofu agi erisaga hu'zanke huo. ³²Mago'mofone hunka Jiu vahepino, Griki vahepino, Anumzamofu vahepinena, zmazeri tanafa hu havegnara osiho. ³³Nagranena anahukna hu'na maka'zama huazampina, maka vahe'mo'zama muse hanazaza nehu'na, nagra knare'zankura nosuanagi, hakare vahe'mokizmi knare'zanku nehanugeno, rama'amokizmia Anumzamo zamagu'vazigahie.

Mono hunte'zamofu naneke

11 ¹Nagrama Jisas Kraisi nege'na nevararuaza hutma nagri navu'nava negeta avaririho. ²Nagra, tmagrira tamazeri

antesgahue. Na'ankure ana miko'zama hazafima tamage'sa antahi nenamitma, antahi'zama rempima huramino'a kante azeri antroko hu'naze. ³Hu'neanagi menina tamagra ma antahيامa hnazegu'ma nehuana, mika vene'nemokizmi aseni'a Kraisi manigeno, a'nemofa asenia vene'ne manigeno, Anumzamo'a, Kraisi aseni'a mani'ne. ⁴Mika vene'nemo'za tavrave zmanunte'ma refitene'za nunamuma hanazano, kasnampa kema hanaza zamo'a zmagra'a zmaseni zmazeri agaze hugahaze. ⁵Hianagi mika a'nemo'za zmanunte refi'otene'za nunamu hanazo, kasnampa kema hanazana zmagra'a, zmaseni zmazeri zamagaze nehaze. Na'ankure agra magoke mani'nen, aseni azoka'ma vazagatetre'nea a'negna nehuno, asenimofona agaze erinemie. ⁶Na'ankure mago a'mo'ma azoka'ma refi'otesuno'a, agra azokara taga hutregahie. Hianagi azoka'ma tagahu zamo'ene, azoka'ma vazagate'zamo'ma a'nemofona agaze'za me'ne hanuno'a, atresageno anuntera refitegahie. ⁷Na'ankure mago ne'mo'a asenirera refi'oteno, agra Anumzamofa amema'ane rahi ami vahe mani'ne, hu'neanagi a'mo'a ve'mofa rahi vahe mani'ne. ⁸Na'ankure, vemo'a, a'pintira eforera osu'neanki, a'mo ve'mofopintira efore hu'ne. ⁹A'mofonkure huno vea trora osu'neanki, vemofonku huno a'ra tro hu'ne. ¹⁰E'ina hu'negu a'mo'a asenirera avame'za refitenkeno, anazamo'a mago'mofa kva'fi mani'ne huno ankeromokizmi zmaveri hugahie. ¹¹Ana hianagi, Anumzamofompina a'mo'a, agra'akera oraoti'neanki, vemofa hanavefi manigeno, vemo'a agrakera oraoti'neanki a'mofa hanavefi oti'ne. ¹²Na'ankure a'mo'a vahemofopinti efore higeno, anahukna huno vemofona a'mo ksenente. E'ina hu'negu, mika'zamo'a Anumzamofopinti efore hu'ne. ¹³Tamagra'a refko hiho, amne a'mo'a asenirera tvaravenura refi'ote'nen Anumzamofontera nunamu haniazamo'a knare hugahifi? ¹⁴Vemofoma zanra azoka'ma hunte'nesiana agra agaze hugahifi? ¹⁵Hianagi a'mofoma zanra azoka'ma hunte'nesiana agra' konaririzane. Na'ankure, zanra azoka'ma ami'neana, refitentenogu ami'ne. ¹⁶Hu'neanagi mago'mo'ma ke hafra amana kegu'ma haniana, nagrama hanuana, tagra ru tavutva ovaririgahune. Maka Anumzamofa veamo'za anahukna antahi'za erigahaze.

¹⁷Ama'i ke avariri hogu'ma kreneramua ke'fina, tamagrira tamazeri sga nosue, na'ankure tamagrama emeri atruma hazafina, knare'zana fore nosianki, havizanke fore nehie. ¹⁸Na'ankure ese knare'ma nagra antahi'noana, tamagra mono kevu naga mani'none hutma etru hazafina, rama'a atane'za megeno mago tamarimpa hu'zana omane'ne. Anankema nentahi'na tamagefi hu'na hu'noe. ¹⁹Tamage amu'no tamifina atane'zana me'ne. E'ina hanageno Anumzamo refko huno hu izo huzmante'nesamo'za amu'nontifina eama hugahaze. ²⁰E'ina hu'negu tamagrama eritru hazafina tivo ne'za (Lord's Supper) nenaku eritru nosaze. ²¹Na'ankure tamagrama ne'zama neneta ruga'amokizmigura zmavegaonte ko nenaze.

Mago amo'za zamaga ene nemanizageno, mago'amo'za negi ti nene'za tusi neginenaze. ²²Tamagrira tine ne'zanema nesaza nontamia omne'nefi? Hifi tamagra mono no azeri haviza nehutma, zamunte omne nagamokizmi zmazeri zmagaze hu'naku nehazo? Nagra na'ane ke hurmantegahue? Nagra tamagrira husga hugahufi? I'o. Ama ana zankura tmagrira husga osugahue.

²³Na'ankure Nagra Ramo rempi hunami'neaza, ete rempi huneramue. Jisas Kraisina komoru hu'za ha' vahe zmazampima avrentenaku haza kenagera, Agra breti erino, ²⁴Anumzamofu susu hunteteno, ana breti ko'nerino amanage hu'ne, Ama'i Nagri navufa, tamagriku hu'na neramuanki, neneta antahinamiho. (Mat 26:27, Mak 14:24) ²⁵Hagi ne'zana netageno, anahukna huno waini kapu erisaga huno amanage hu'ne. Ama'i waini kapua, kasefa hagerafi ke kora niareti nehue, amana hutma maka knama waini tima nenenutma tamagesa antahinamiho. ²⁶Na'ankure ama breti, ama kapufinti'ene nesaza zupa, anazamo'a Ramofo friza huama nehanigeno, ete Ramo'a egahie. (Mat 26:26-28, Mak 14:22-24, Luk 22:17-19) ²⁷E'ina hu'negu iza'o havi avu'ava hu'nenno, breti Ramofo kapufinti nesimo'a, Ramofo avufgafine korama'arera kefoza huno, kumi hugahie. ²⁸Mago'mo'ma breti, kapufinti neku'ma hanuno'a, agra'a avu'ava'zana refko huteno, ana breti kapufintira negahie. ²⁹Na'ankure mago'mo breti tine neneno, Ramofo avufga, nenoe huno antahi ama osnimo'a, agra'a azeri haviza nehie. ³⁰E'ina hu'negu, amu'no tamifintira hakare'amo'za hanavea omne amne hige'za, kria erizageno mago'amo'za ko fri'naze. ³¹Hianagi tagra'ama refko huta tazeri fatgo osu'nesuta, keagafi manigahune. ³²Hianagi Ramo'ma tagri'ma refko'ma nehiana, ama mopafi vahe'ma huhampri zmante'nea knazampina uofresunegu tazeri ante fatgo nehie.

³³E'ina hu'negu, nenfugata nensarogata tamagra ne'zama nenaku emeri atruma hanuta, zmavega ante'nenkeno maka etru hutenketa neho. ³⁴Hagi mago'mofoma aga'matesigeno'a, agra nonkuma'arega neteno eno. Na'ankure tamagra ma etruma hanafina, refko ohunte ahunte zana omnegahie. Hagi mago'azana, henkama esu'na emeri fatgo hugahue.

Ruotge Avamupi ruzahu ruzahu eri'za erisnaza naneke

12 ¹Hagi nafuhegatane nensarogata avamu'mofo muse zanku'ma hu'naza zamofonku eriana hu'na tmasami'za hue. ²Tamagra ko'ma kaza osu havige anumzante'ma mni'naza no manizantmia antahi'naze. Ke osu anumza antre'za tro hunte'naza zamo tmavazu higetma, avaririta fanane hukante vu'naze. ³E'ina hu'negu nagra anage hu'na antahintahima eriana hanugura neramasamue, magore huno Anumzamofu Avamu'ma agu'afima mni'ne'nia vahe'mo'a Jisasina huhaviza huontegahie. Hagi mago'mo'e huno Jisasi'a Ra mni'ne huno osugahanagi, Ruotge Avamu'mo aza hanigenoke'za hugahie.

⁴Hagi hakare'a ruzahu ruzahu museza me'neanagi, magoke Avamu'moke'za neramie. ⁵Ruzahu ruzahu mono eri'za me'neanagi, Ramo'a magoke mani'ne. ⁶Hagi ruzahu ruzahu kankamumpinti eri'zana e'nerianagi, magoke Anumzamo hakare zampine, mika vahepina e'nerie. ⁷Hu'neanagi Avamu'mofo eri'zamo'a magoke magoke'mofonte, mikomofa so'eza efore hanigu ko tami'ne. ⁸Hagi mago'mofona Avamupina knare antahintahiza (wisdom) nemino, mago'mofona ama' antahi'za (knowledge) nemie. Hianagi magoke Avamu'mo, ⁹mago'mofona amentinti hu'za nemino, mago'mofona vahe'ma azeri knamre museza ami'ne. Hianagi magoke Avamu'mo zanami'ne. ¹⁰Hagi mago'mofona ruzahu ruzahu kaguvaza eri fore hu museza nemino, mago'mofona kasnampa ke huamahu museza nemino, mago'mofona avamutmima rezagneno ke museza nemino, mago'mofona ruzahu ruzahu zmegeru'ma ru museza nemino, hagi mago'mofona ruzahu ruzahu zmageru'ma rukrehe hu museza ami'ne. ¹¹Hianagi magoke ana Avamu'moke, mika'a eri'zana erifore nehie. Hagi agra'a avesite magoke magoke'mofona nazano aminaku'ma hia musezana refko huno nemie.

Anumzamofa naga'mota Jisasi avufgagna huta mani'nona naneke

¹²Anahukna huno vahe'mofona magoke avufa me'neanagi, ru avufgamo ru avufgamo rekanuhegeno, magoke vahera fore huno mni'ne. Kraisi'a anahukna hu'ne. ¹³Na'ankure mago'amota Jiu vahe manunkeno, mago'amota Griki vahe mni'none. Mago'amota kazokzo eri'za vahe manunkeno, mago'amota amne vahe mni'none. Hianagi tagra magoke Avamupi tina freta, magoke avufafi mni'none. Ana higeta ana miko'mota magoke Avamupinti tazahu'zana e'nerune.

¹⁴Hagi magoke tavufa me'neanagi, ru tavufa ru tavufamo rekanuhegeno tavufa fore hu'ne. ¹⁵Hagi agamo huno, nagra azana omni'noanki'na, mago avufa omni'noe haniana, e'i ana kema haniazamo'a, avufafintira azeri otregahie. ¹⁶Hagi agesamo huno, nagra avurga omninoanki'na, mago avufa omni'noe haniana, e'i ana kema haniazamo'a, avufafintira azeri otregahie. ¹⁷Hianagi mika avufamo'ma avurgage'za mesigeno'a, inafinti kea antahigahie? Hianagi mika avufamo agesage mesigeno'a, inafinti mna antahigahie? ¹⁸Ana hu'negu tamage Anumzamo'a, magoke magoke tavufa eri mago huno ante'neankino, Anumzamo agra'a avesite mesie huno hire mete mete hu'ne. ¹⁹Hu'neanagi mika avufamo magoke avufgage'ma mesiana, avufamo'a inankna huno mesine? ²⁰Ana hu'negu hakare avufgamo eme rekanuhegeno, magoke avufa fore huno me'ne. ²¹Hagi avurgamo'a azamofonkura huno, kagrama nazama hu'zankura antahi nonkamue huno osugahie. Ananzanke huno asenimo'a agamofonkura huno, kagrama nazama huzankura, nagra antahi nogamue huno osugahie. ²²Hianagi mago'a tavufamokizmia

hanave zmi omne'ne huta huna zmufamo'za, ra eri'za e'nerize. ²³Hagi tagrama knare osu'ne huta huna tavufamofona knare'za hunenteta, hagi tageze tavufe huta huna tavufamofona kukena huzmanteta refi'netone. ²⁴Knare'ma huno amate me'nea tavufamo'za mago'zankura upara nosaze. Ana nehunanagi, Anumzamo'a ana miko tavufa eri magoke higeno, tavufamofona eri magoke huno knare osu tavufamo'za knare'za nehaze. ²⁵E'ina hanigeno avufamo'a atne'za amu'nozmfina omnegahie. Hagi anahukna huno amu'no zmifina oza aza huno mani'za megahie. ²⁶Hagi mago kaziga avufamo ata hozama eri sigeno'a, mika'mo'za ana atazana erigahaze. Hagi mago kaziga'a avufamo ra agima erinkeno'a, ana miko avufamo'za muse hugahaze.

²⁷Menina tamagra Kraisi avufa mni'naze. Hagi magoke magoke'mota, mago avufga'a manite manite hu'naze. ²⁸Hagi, mono eri'za erisagu Anumzamo huhamprizmante'nea vahera, esera aposol nagare, anantera kasanampa vahere, anantera rempi huzami vahere. Ana huteno Anumzamo'a kaguvazama hu vahe zmazeri otino, mago'amokizmia vahe'ma krifintima zmazeri kanamre muse'za nezamino, mago'amokizmia vahe'ma zamaza hu muse'za nezamino, mago'amokizmia kva eri'za eri muse'za nezamino, mago'amokizmia ruzahu ruzahu ageru ru muse'za zami'ne. ²⁹Mika'mo'za aposol nagake mani'nazafi? Mika'mo'za kasanampa vaheke mani'nazafi? Mika'mo'za rempi huzami vaheke mani'nazafi? Mika'mo'za kaguvaza hu vaheke mani'nazafi? ³⁰Mika'mo'za vahe'ma zmazeri knamre museza eri vaheke mani'nazafi? Mika'mo'za ruzahu, ruzahu zmageru, ru vaheke mani'nazafi? Mika'mo'za zmageru rekrehehu vaheke mani'nazafi? I'o anara osugahaze. ³¹Hu'neanagi tamagu'areti huta agetere'nea muse zankura tmavesinteho. Nagra mago knare'zantfa huno mreri'nea kana tamaveri hugahue.

Avesinte zamofa naneke

13 ¹Nagrama vahe zmagerupintiro, ankeru vahe'mokizimi zmagerura rugahuanagi, vahe'ma avesinte'zama omne'nenke'na, bero'mo ra ageru riankna nehu'na, zavena ahageno ageru riankna hugahue. ²Hagi kasnampa ke hu muse'zane mika e'neri'na, Anumzamofu oku antahizama'a e'neri'na, mika knare antahi'zana e'neri'na, nagra mika hanave namentintia hanugeno agona retufega hugahianagi, avesinte'zama omne'nenigeno'a ana miko'za hanua zamo'a amnezankna hugahie. ³Hagi nagrama maka'zani'a atre'na, zamunte omne vahe ne'za nezami'na, atresugeno tevefi navufa krefnane hugahianagi, nagripima vahe'ma avesinte'zama omne'nesigeno'a, ana miko'zamo'a amnezankna hugahie.

⁴Avesinte'zana, agazone huno mni'zane, avesinte'zana so'e avu'ava hu'zane, avesinte'zana kenunu hu'za omneno, ra agi eri'zana omne'ne, avesinte'zana avufga ra hu avu'ava hu'zana omne'ne, ⁵veganokno'zana

omne'ne, agraguke antahi'zana omne'ne, agra ame'ama huno asi ovazi'zane, rumo haviza hunte'nea zanku nontahino agekanino mani'zane. ⁶Avesinte'zamo'a havi avu'ava'zankura musena nosie. Hagi tamagezanku musena nehie. ⁷Avesinte'zamo'a, agazone huno mni'nenona maka knazana e'nerino, amentinti nehuno, maka'za fore hugahie huno nentahino, maka knazana erino vu'za me'ne.

⁸Avesinte'zamo'a vgaoregahie. Ana hu'neanagi kasnampa ke hu'zamo ene, ru vahe zmageru ru'zamo ene, knare antahintahizamo'a vgaregahie. ⁹Na'ankure tagra osi'a antahi'none. Anama antahi'nona avamente kasnampa kea huama nehune. ¹⁰Hu'neanagi ana miko'zamofa fatgozama esigeno'a, osi'a zama nentahuna zamo'a fnane hugahie. ¹¹Ko'ma mofavre'ma mni'norera, mofavremo nehiaza hu'na nanekea nehu'na, antahintahia nehu'na, nagesa antahi'na refko'ma hu'noana mofavremo'za nehazaza hu'noe. Hu'neanagi rama nese'na, mofavre avu'ava'zana atre'noe. ¹²E'ina hu'negu kapopima avugosa ke so'e osiankna menina nehunanki, henka'a Anumzamofa avufi oge age hugahune. Menina Agrira osi'a ke'na antahi'na hu'noanagi, henka'a kena antahi'na hugahue. Agrama nagri'ma maka nageno antahini hu'neankna hugahue. ¹³Hagi ama'i tagufa'azamo mevava hugahie, amentintihu zane, fore hugahie huno antahi amuha hu'zane, avesinte zane me'ne. Hu'neanagi ana tagufa zampintira, avesinte'zamo agatereno tusi'a zana me'ne.

Kasnampa ke hu muse'zamofone, ru zamageru ru muse zamofa naneke

14 ¹Avesinte'zamofa kana, nevaririnka Avamu'mofo musezantaminkura tusiza hunka kavesinto. Hianagi Avamumofa musezantaminkura, kasnampa ke huama huzanku kavesinto. ²Na'ankure mago'mo ru ageru araniana vahetega norie. Hagi Anumzamofontega ru agerura nerie. Na'ankure mago'mo'a ana agerura antahi ama nosianagi, agra'a avamupi frakino oku me'nea ageru nerie. ³Hu'neanagi iza'o kasnampa ke nehimo'a, vahe zmazeri hankavenetino, zmazahuke nezmasamino, zamarimpa zmazeri so'e huke zmasamigahie. ⁴Iza'o ru ageru nerimo'a, agra'a azeri hanavenetie. Hu'neanagi iza'o kasnampa ke nehimo'a, mono kevumofa zmazeri hanavenetie. ⁵Nagri'ma navemanesiana, maka'mota ru tamageru'ma aranazegu navenesie. Hu'neanagi ra navesi'zana, maka'motma kasnampa ke hiho nehue. Hagi iza'o kasnampa ke nehimo'a, ru ageru nerimofona azeri agatere'ne. Hu'neanagi ru agerutamima nerimo'ma, ana ageru'mofo agu'agesa eri ama hanigeno'a, mono kevua zmazeri hanavetigahie.

⁶Menina nenfugatane nasareheheta, tamagrite ne-ena ru agerutmima ranuana, inankna huta tmaza hu'zana erigahaze? Hagi nagra eriamu nehu'na, antahintahi nerami'na, kasnampa kene nehu'na, rempi hunerami'na, eriamu hu'na tmasamisugeno, antahi amara hugahaze.

7E'i asimu omne zantamimo, konkemo'ene zavenamo'ene ageru neriankna huno, ageru ru so'ema osaniana nankna hu'za ana konkene zavenamokea znageru'ma arana'ana antahi amara hugahaze? ⁸Hagi ufemo'ma krafa hu so'ema osnigeno'a, iza ha'ma hanigura retro hugahie? ⁹Tamagranena e'i anahukna hugahaze. Vahe'mo'za nentahisaza zmageru'ma aranageno'a knare hugahie. Ru zmageru'ma aranage'za, nankna hu'za vahe'mo'za ana ketmia antahi amara hugahaze? Ana keka'amo'a amne'zankna hugahie. ¹⁰Mopafina hakare'a ruzahu ruzahu zmageru me'ne, anamokizmi zmageru'mofona agafa'a me'ne. ¹¹Hagi ru ageru arania kemofa agafa'ama antahi ama'ma osnuana, nagra agritera ru vahe kna hunentesnugeno, agranena nagriteru ru vahekna hunantegahie. ¹²Kagri'enena e'inahukna hugahie. Kagra avamu'mofo musezantminkura tusi'a antahintahi hanunka, Anumzamofa antahigegenoma maka mono kevuma zmaza hania Ruotge Avamu'mofo muse'zana tamino.

¹³E'ina hu'negu, iza'o ru ageru aranimoma, ana kema agra'a rekrehe hu'zankura, nunamu huno Anumzamofa antahigeno. ¹⁴Na'ankure nagrama ru agerupinti nunamu hanuana, avamu ni'amo nunamuna nehie. Hianagi antahintahi ni'afina nena'a nomane. ¹⁵Hu'negu nagra na'a hugahue? Antahintahi'nireti nunamuna nehu'na, Avamu'niareti ene nunamuna hugahue. Avamu'niareti zamera nehu'na, antahintahi'niareti enena zamera hugahue. ¹⁶Ana hu'negu kagrama avamupintike Anumzamofa agima erisaga nehnakeno'a, inankna hu'za ana ageru'ma nornamo'za antahiamara hu'za, kagrama hanana kerera tamage hugahaze? Na'ankure kagrama agima erisaga hanana kea antahi ama nosaze. ¹⁷Na'ankure kagra knare zantfa hunka Anumzamofa musenke huntegahane. Hu'neanagi rumofona aza hunka azeri hankve otigahane. ¹⁸Nagrama mika'motma tamagetere'na rama'a ru agerupinti'ma neruazankura, Anumzamofona susu huntoe. ¹⁹Hu'neanagi nagri'ma navemanesiana mono kevufima, antahi ama huga 5fu'a kema hanugeno, ruga'amokizmima knare antahintahi zami'zamo'a, ru agerupinti'ma (10 tausen'i'a) kema hanuana agatere'ne.

²⁰Nenafugatane nasarehetma, osi mofavregna huta antahintahia osiho, havi avu'ava huzankura aminte mofavre'gna hiho. Hagi antahintahi tamifina ra vahe kna huta maniho.

²¹***Nagri'ni'a vahepina ontahinaza agerupinti kea hunezami'na, ru vahe zamagipi huvazi'na hugahuanagi, ontahigosaze,*** huno avontafepina hu'ne. (Aisa 28:11-12)

²²Hu'negu ru ageru'ma ru'zana e'i avame'zane, zamentinti hu'naza vahe'mokizmi avame zanompage, zamentinti osu vahe'mokizmi avame'zane. Hu'neanagi kasnampa kema hu'zana, zamentinti osu vahe'mokizmi zmaza hu'zankurompage, zamentinti hu'naza vahe'mokizmi zmaza hugahie. ²³E'ina hu'negu maka mono kevumo'zama eme atru

nehu'zama ana maka'mozama ru ageru tmima nernage'zama, ana ageru'ma noranamo'zo, zmentinti nosnamo'za efresu'za, tamagra neginagi nehaze hu'za hugahaze. ²⁴Hu'neanagi maka'motma kasnampa kema nehanageno, zmentinti nosnamo'zo, kasanampa kema nosnamo'zama efresu'za, ana maka'mota hanaza kemo eriamana hinkeno, kumi'a agra negeno, nagra kumi vahe mani'noe huno refko hugahie. ²⁵Ana hanigeno agu'afima oku me'ne'nia agu'agesamo'a efore hanigeno, agra avugosaregati arena reno umaseno, Anumzamofona mono hunenteno, hu'ama huno tamage Anumzamo'a tamagrane amu'nontamifi mani'ne huno hugahie.

Anumzamofonte so'e mono huntesa zamofonaneke

²⁶E'ina hu'negu nenfugatane nasareheheta na'a efore hugahie? Eme atru hanaza zupa, mago'mo mono zgamera nehinkeno, mago'mo rempi huneraminkeno, mago'mo ksefa'za Anumzamo averi haniaza huama nehinkeno, mago'mo ru ageru nerinkeno, mago'mo rekrehe hugahie. Hagi e'i ana maka'zama hanaza zamo'a, knare huno mono kevua zamaza huno, Ramofompina zmazeri hankavetigahie. ²⁷Iza'o ru ageru'ma aranuno'a, taremoke ana znagerura ri'o. Hagi tagufa agetere'amo'za oriho. Mago'mo ru agerura nerina, mago'mo rekrehe hunete'na hiho. ²⁸Hu'neanagi rekrehe hu vahe'ma omni'nenana, ru ageru ru vahe'mo'a akoheno taganeno mono kevufina mani'nenana, agra'agu'ene Anumzamofontega agerura akoheno rugahie. ²⁹Zametrenke'za tareo tagufa kasnampa vahe'mo'za kasnampa ke'a nehanage'za ruga'amo'za ana nanekea refko hu'za antahiho. ³⁰Hianagi Anumzamo mopafi mani'nesimofonte'ma ksefa'za averi nehina, kotama kema nehanimo'a, kea osu taganeno mani'nenkeno, kea huama hugahie. ³¹Hagi tamagra maka'mota amne kasnampa kea magoke magoke'mota hutehute nehnageno, maka'mofona antahintahia nezamino, zamazeri hankavetigahie. ³²Kasnampa kema hu avamu'mofo agorga'a mani'ne'za, kasnampa vahe'mo'za knazmima esige'za, kasnampa kea hutere hugahaze. ³³Na'ankure Anumzamo'a ke'onke'za eri savrisavra osu Anumzana omani'ne, hagi rimpia fru Anumzane. Maka Anumzamofono mono kevu naga zmazeri ruotge hu'neakna hiho. ³⁴Mono kevuma eritru hanafina, a'nemo'za akohe'za vene'nemofono zmagorga maniho. Na'ankure kema hu'zankura hu izo huozmante'naze. Tra kemo'ma hu'nea kante ante'za venenemofono zmagorga'a maniho. ³⁵A'nemo'za mago'a zanku antahisunema hanu'za, nontega nezmave antahige'ho, na'ankure a'mo mono kevufi ke hu'zamo'a knarera osu'ne. ³⁶Tamagrama antahizana Anumzamofono kema antahizamo'a, tamagripinti agafa huno, tamagripinke vgaregahie hutma Korinti vahe'mota nehazafi? I'o, tamagra havige nehaze.

³⁷Mago'mo'ma huno kasnampa vahe mani'noe huge, avamupi antahizane vahe mani'noe huno hanimofono, atrenkeno anamo'a

amama kreramua avona, Ramo huo huno hunte'nea kasege huno agra'a antahi'ama hino. ³⁸Hagi ama avoma keno antahino osanimofona, agrira ke'za antahi'za osugahaze. ³⁹Ana hu'negu nafu nagnaheta kasnampa ke hu'zankura tusiza huno tamenesinketa, ru agerupinti'ma ru'zana aseovaziho. ⁴⁰Hianagi maka zama hanaza zamo'a, fatgo huno knare kante hiho.

Jisasi fri'nefinti oti'nea naneke

15 ¹Hanki nenfugatane nasarehegata Anumzamofa knare musenke ko tmasamugeta eri'neta, oti hanavetita anankere tamentinti hu'naza naneke hurmagesa hunaku nehue. ²Ama'i ana knare musenkereti tmahokeno tamagu'vazineanki, tamagra ma amama huama nehua kema azeri akonama osnageno'a, tamentintimo'a amne'zankna hugahie.

³Na'ankure miko'zama agatere'neazana nagra ko erite'na, neramasmue. E'i anazana Anumzamofa avontafepi kre'nea kante Kraisi tagri kumiku huno efri'ne. ⁴Anumzamofa avontafepi krente'nea kante ante'za asentetageno maniteno tgufa knare oti'ne. ⁵Pitante (Sifas) ufore huteno, ete 12fu'a amage'ma nentaza disaipol nagate ufore hu'ne. ⁶Ana huteno 500ti'a agatere'a amage'ante disaipol naga mni'nazafi ufore hige'za ana miko'mo'za ke'naze. Anampintira rama'amo'za menina ofri manizageno, hagi mago'amo'za fri'naze. ⁷Hanki anante Jemisinte ufore huteno, ete maka aposol nagate efore nehuno, ⁸hagi henka'arfana, kasentega kna me'negeno ame huno kasenante'nea ne', e'i nagrite efore hu'ne. ⁹Na'ankure Anumzamofa aposol nagapina nagra henka vahere, nagrikura tamagra Anumzamofa eri'za vahere hutma huga vahera omni'noe. Na'ankure Anumzamofa mono nagamokizmi ha' rezmante'noe. ¹⁰Hu'neanagi Anumzamofa asunku'zanteti nagra amanahu kna hu'na mni'noe. Hagi nagri'ma asunku'ma hunante'neazamo'a amne zankanara osu'ne. Ete ana miko eri'za nagara zmagatere'na erizana mago'ane eri'noana nagra'niompage, Anumzamofa asunkuzamo'a nagrane me'nege'na eri'noe. ¹¹Hanki nagra huama hanuo, zamagra eri'za naga'mo'za huama hnazo, tagra ana nanekege huama nehunketa tamagra tamentintia hu'naze.

Maka fri vahe oti'snaza naneke

¹²Hagi Kraisi'a fripinti oti'ne hu'za huama hu'nazana, inanka huta mago'amota amu'nontmfintira, vahe'mo'za fripintira o'notize huta nehze? ¹³Hu'neanagi friteno oti'zama omneneresina, Kraisi enena ora otisine. ¹⁴Anumzamofa Kraisi'a fripinti azeri ora oti'neresina, mono nanekema huama hu'nazamo'a amne'zankna higeno, tamagri tamentintimo'enena amne'zankna hisine. ¹⁵Mago ene Anumzamofona havige eri'za vahere huno tazeri fore hisine. Na'ankure Jisasi fri'nefinti Anumzamofa azerioti'ne huta tagrama hanuna zamo'a, Anumzamofona ha'rentegahie.

Jisasi'a ora'otineresina, fri'namo'za ora'otizaresine. ¹⁶Na'ankure fri'nea vahera azeri orantiasina, Kraisinena azeri ora otisine. ¹⁷Hanki Kraisima azeri oraotineasina tamagri tamentintimo'a amnezanka higeta, tamagra kumipi manizasine. ¹⁸Hagi Kraisinku zamentinti nehu'za fri'naza vahe'mo'za fanene hazasine. ¹⁹Kraisimpi menima tasimu erita mni'nona nomnizampike taza hugahie huta tamentinti hanunana, vahe'mo'za zmasunku hunezmantaza vahera zmagatereta, tusi'a zmasunku hurantesaza vahe manigahune.

²⁰Hu'neanagi Kraisina fripinti Anumzamo azeri oti'neazamo'a, fri'naza vahe'mokizmia ese ne'za hozafinti eriankna hu'ne. ²¹Na'ankure magoke ne'pinti fri'zana egeno, anahukna huno friteno oti'zana magoke nepinti e'ne. ²²Anahukna hu'za Adamu fri'neaza hu'za maka naga'amo'za frisnageno, anahukna hu'za Kraisi'ma kasefa huno asimu'ma eri'neaza hu'za, naga'amo'za zmasimura erigahaze. ²³Hu'neanagi mago magomofona fripinti'ma azeri oti'siana kankamuma'a metere hu'ne. Esera Kraisi oti'neankino anantera, Agrama ete esnia knafina, Kraisi naga'moza otigahaze. ²⁴Anantera mika'zama vgare knamo esigeno, Jisasi'a maka hanave kumatamine vahe'ene, ugagota kva vahe ene mika ama mopafi hanavema zmahe fanane hute'nuno'a, Kraisi'a hanave'a Nefa Anumzamofa azampi antegahie. ²⁵Na'ankure miko'zamo'a Kraisi kvafi me'nenigeno, mika ha' vahe'amokizmia zmazeri fenkamitegahie. ²⁶Henka rfama, azeri fanene haniana fri'zamo ha'ma reneranteazana, ahe fanane hugahie. **²⁷Na'ankure avontafepi amanage hu'ne, mika'za kegvahu hanavea Anumzamo'a Kraisi ami'ne.** (Sam-Zga 8:6) Hu'neanagi ana hanavea Anumzamo'a Kraisi ami'neankino, Anumzamo'a Kraisi agorga omanine. ²⁸Mika'zana Kraisi'a agatereteno, Agri'ma hankavema ami'nemofa, Nefa Anumzamofa agorga maninkeno, Anumzamo hakare zampine, mika kaziga manigahie.

²⁹Fripinti'ma azeri oti'zama omne'neresina, na'a hugahaze fri vahe zmaza hukure hu'za mono ti nefraza vahe'moza? Ana fri vahe'mo'zama o'otisageno'a, hagi na'ante fri vahera zmaza hukure hu'za mono tina nefraze?

³⁰Hagi nahigeta tagranena hazenke zampina hakaregna nemnune? ³¹Tmage hu'na, nenfugata nensarogta neramasmue. Ranti Kraisi Jisasimpi mani'nena tamagriku muse nehuazamo'a, mika zupa fri'za hutere nehue. ³²Efesasi kumapima afi' zgane ha'ma hu'noana, tamagrama antahizana nagra na'a eri'noe? Hanki fri vahe'mo'za o'otizaresina, **menina ne'zane tine negahune, na'ankure okina frigahune.** ³³Hanki negi vahera omniho. Havi zamavuzmava nehaza vahe'mo'zane utagroteta mnisazana tmazeri havige vahe aseghaze. ³⁴Tamagra knare antahintahi enerita kumira osiho. Na'ankure mago'amotma Anumzamofona keta antahita osu'nazagu, ama kema nehuana tamagaze hinogu nehue.

Fripinti azeri otisia avufgamofa naneke

³⁵ Hu'neanagi mago'mo'a anage hugahie. Inankna huno fri vahera zamazeri otigahie? Inanknahu zamufgane otigahaze? ³⁶ Kagra Neginenane! Avimazama mopafi ase'nankeno'a fritenoke rutaha huno nehage. ³⁷ Avimzama nesanana rutareno ko hage'nea zana nonkrine. Hianagi witi avimazapi ru avimazana amne ase'nankeno henka hageno ruzahura nehie. ³⁸ Hu'neanagi Anumzamo Agra'a avesite mika avimzamofona, mago mago avimzamofona agri'a avufga'a amite amite hu'ne. ³⁹ Maka zgamofona mago'zahu avufga omne'ne. Vahe'mota mago'zahu tvufgane manunkeno, zgagafamo'za ruzahu zmavufga erizageno, nmamo'za ruzahu zmufga erizageno, noza'mo'za ru zmufga eri'naze. ⁴⁰ Anahukna huno monare avufga megeno, mopare avufga me'ne. Hu'neanagi monare avasese zana mago megeno, mopare avasese zana ete me'ne. ⁴¹ Hanki zgemofona mago avasaseza megeno, ikamofona ru avasaseza megeno, hanafitamimofona ru avasase zana me'ne. Na'ankure mago mago hanafi'mo'a, agra'a avasasezane me'ne.

⁴² E'inahu kna huno fri vahe'mokizmi zmazeri otisia zupa, kahefa zamufga fore hugahie. Kerifi asentesia avufga fanane hugahie. Hanki fripinti ete otisania avufga, fanane osu mevava hugahie. ⁴³ Hanki kasrino knare osu'nenia avufga asentegahie. Hianagi azeri otisia avufga, knare huno masa'ane avufgare azeri otigahie. Hanave'a omne avufga asentegahanagi, hanave nentake avufga azeri otigahie. ⁴⁴ Asentesnia avufga mopafi avufga asentegahie. Azeri otisnia avufga, monare avufga azeri otigahie. Ana hu'negu mopare avufga me'nesigeno'a, anazanke huno monare avufgane megahie. ⁴⁵ Anumzamofa avontafepi anage huno krente'ne, ***Ese nera Adamu tro higeno, asimura erino mani'ne.*** (Jen-Agf 2:7) Hagi henka fore hu'nea Ada'a zamasimu zami Avamu efore hu'ne. ⁴⁶ Hu'neanagi esera monare avufga fore osu'ne. Hagi esera mopare avufga fore hutegeni, henka monare avufga fore nehie.

⁴⁷ Kota nera mopafinti kugupa erino tro higeno asimura erino mni'ne. Hianagi henka nera Kraisi monafinkati e'ne. ⁴⁸ Anahukna huno mopare nera manigeno, mopafi vahe'enena mani'naze. Hagi anahukna huno monare nera manigeno, monare vahe'enena mani'naze. ⁴⁹ Menina mopare tro hu'nea ne'kna huno tro hurante'neankita, anahukna huta henka'a monafinkati ne' kna hugahune. ⁵⁰ Nenafugta nensarogta amanage hu'na neramasamue, ama tavufgarera Anumzamofa Kumara erisanti oharegahune. Anahu kna huno fnanene hu'zamo'a manevava zana erisanti oharegahie.

⁵¹ Oku naneke tmasami'za huanki antahiho, mika'mota ofrigahunanagi tagra ruzahie hugahune. ⁵² Mago knama esigeno'a, tvurga keramage nehuna kna huno, vgare ufenkrafa hanigeno'a, ana fri'naza vahe'mo'za

o'netisageta mika kasefa huta mni'nomota tavufamo'a ruzahе hanigeta onkasari hanave tavufa erigahune. ⁵³Na'ankure kasri avufgamo'a onksari avufga eri hankrenkeno, fri avufgamo'a ofri avufga eri hankregahie.

⁵⁴Hu'neanagi ana kasri avufgamo onkasri tvufga erisigeno'a, fri avufgamo'a ofri avufga erina, avontafepi amanage huno kre'nea kemo e'ama hugahie: *fri'zana Anumzamo ahe fanane hugahie!* (Aisa 25:8)

⁵⁵*Fri'zamoka ina hanaveka'a me'ne? Fri'zamoka atama neminazanka'a ina me'ne?*

(Hos 13:14) ⁵⁶Kumi'mo fri'zamofa atazana eri fore nehigeno, kumi'mo'a hanave'a kasegefinti e'nerie. ⁵⁷Hu'neanagi Anumzamofa muse huntесune, Rantimofa Jisasi Kraisimpi taza higeta hara agatenerone.

⁵⁸E'ina hu'negu tusiza hu'na navesi nermantoa nenfugata nensarogta, oti hanavetita kaza osu maniho. Hakare zupa Ramofa eri'zama eri'zankuke nentahita mniho. Hagi antahio, Ramofa eri'zama tamamu'nama nehagegetma e'neriza zamo'a amnezanknara osugahie.

Anumzamofa amage nentaza vahe'mokizmi zago hage'zamisnaza naneke

16 ¹Jerusale kumate mni'naza mono nagamokizmi zgoma eri atruma nehza zanku hu'za hue, Galesia kaziga mni'naza mono naga'ma hiho hu'na huzmante'noaza hiho. ²Hakare Sontamofona ese knare, tamagra mago mago'mota zgo'ma erisafintira, erisnaza avamente refko hutma eri atru hu'nenke'na, nagra esua knafi eri tru huzankura osaneno. ³Nagrama uhanatisu'na huhampri' zmante'nesamokizmia, huzmanta'nenana, ana musezamofa agofetura avonkrenta'nenana eri'za Jerusale kumate vugahaze. ⁴Hagi nagrama vuga'ma hanugeno'a, zamagra nagrane vugahaze.

⁵Hu'neanagi nagra Masetonia vute'na, henka tamagritega egahue. Na'ankure Masetoniati ru kitagi'na vugahue. ⁶Tamagrane osi'agna umanisuo, ete zasi ko'ma atu ikampina tamagra ne mni vgaresugeta, inantegama vunaku'ma hanurega naza hu'tma hunante'nage'na vugahue. ⁷Na'ankure nagri'ma navenesiana menima vanu'na tamageme vuku nosuanki, Anumzamofa avesima me'nenke'na mago'a zaza kna tamagra ne umani'ne'na vanuegu nehue. ⁸Hu'neanagi Efesasi kumate mani'nesugeno, Avamu'mo erami'nea (Pentikos) kna efore hugahie. ⁹Na'ankure eri'zamo'ma knare huno vuga kana rama'a efore nehigeno, rama'a vahe'mozanena ha renenantaze.

¹⁰Hanki Timoti esigeta, nagra Ramofa eri'za e'nerua kna huno e'neria neki, ke'amofona antahi nemita azeri so'e hiho. ¹¹Kva hunenteta agi eri haviza huonteho. Hanki ana nehuta aza nehageno mani'nenano, fru huno nagra mni'ne'nurega ehntatisnie. Timoti'ene mago'a nafu naganahе'zane ete esnagu zmagega ante'na mani'noe.

¹²Hu'neanagi Apolosi, nerafu kazigagu hu'za hue. Tmagritegama nerafuzanema esia kazigatira, nagra razampi azeri hanaveti kea nesamue. Hagi menima esiana agri'a avesi omne'neanagi, kankamuma me'nenkeno'a egahie.

Huv gare ke zmazeri hanavetinaku zamasmine naneke

¹³Kava nehuta, tamentinti zampi oti hanavenetita, korera osu hanavetita maniho. ¹⁴Maka'zama hanaza'zampina tamavesinte avu'ava zampinti hiho.

¹⁵Nenfugta nensarogta tamagra antahi'naze, (Stefanisi ene noma'afi mani'nazana, ese'ma Akaia kumateti zmagu'a rukrehe hu'naza nagare. Ana hute'za zamagra zamagu'a mono eri'zampi ami vganere'za mono eri'za e'neri'za nagare). ¹⁶Hanki tamagranena e'inahukna vahe'mofo avu'ava avaririta mani'neta, hagi anahukna eri'zama zmaza hu'za erisazamokizmine, nezmavariritma zmagorga'a manihogu neramasamue. ¹⁷Stefanisi ene Fotunatusi'ene Akiasi'zama aza'zankura nagra muse hu'no'e. Na'ankure tamagra ma huga'zana osazage'za zamagra eme naza hu'naze. ¹⁸Na'ankure knare antahintahi nami'za avamu'nifina nazeri fru nehu'za, tamagri'ene ana hu'naze. E'inahukna vahetmina zamege so'e hiho.

¹⁹Esia kaziga mani'naza mono naga'mo'za muse ke atrermantaze. Akuira ene Prisila ene noznifima nemniza mono nagamo'zanena anahukna hu'za zmagu'areti musenkea atrenermantaze. ²⁰Maka Anumzamofu naga'mo'za musenkezmia atre nermantaze. Hanki tamagra nena anazanke huta mono naga'mota muse ohunte ahunte hiho.

²¹Poli'na nagra, ama musenkea, nagra nazampinti kre neramue. ²²Hanki Ramofoma avesi ontesnimo'a, sifnafi manino haviza hugahie. Rantimoka eno! ²³Hanki Ramofu Jisasi asunku zamo'a tamagra ne mesnie. ²⁴Nagri nevesi'zamo'a maka Kraisi Jisasi'pima mni'naza naga'motarega mesnie. Tmage.